

**Uunga siunnersuut: Uranimik il. il., misissueqqaarnermut, ujaasinermut piiaanermullu inerteqquteqarneq pillugu Inatsisartut inatsisaat**

(Ineqarnermut, Attaveqaasersuutitut, Aatsitassanut, Inatsisit Atuutsitsinneqarnerannut Naligiissitaanermullu Naalakkersuisoq)

**Akissuteqaat**

(Ineqarnermut, Attaveqaasersuutitut, Aatsitassanut, Inatsisit Atuutsitsinneqarnerannut Naligiissitaanermullu Naalakkersuisoq)

**Pingajussaanneerpeqarnera**

Inuussutissarsiornermut Aatsitassanullu Ataatsimiititaliaq inatsisissatut siunnersuummik sukumiisumik suliarinninneranut Naalakkersuisut qutsavigaat.

Taamatutaaq ataatsimiititaliap isumaliutissiissuteqarneranut Naalakkersuisut Inuussutissarsiornermut Aatsitassanullu Ataatsimiititaliaq qutsavigaat.

Ataatsimiititaliami amerlanerussuteqartut, Siumup aamma Atassutip ilaasortaatitai, isumaliutissiissummi allannguutissatut siunnersuutit marlunnik saqqummiussipput. Ikinnerussuteqartut, Inuit Ataqtigii ilaasortaatitaasa, allannguutissatut siunnersuutit tamarmik itigartinneqarnissaat aammalu siunnersuutaqqaartup akuerineqarnissaa, inassutigaat.

Allannguutissatut siunnersuummi siullermi pineqarpoq siunnersuummi § 5-ip allanngortinneqarnissaa, taamaalillutik Naalakkersuisut Inatsisartut inatsisaata atuutsilernissaanut piginnaatinnegassallutik, taamaattoq siusinnerpaamik najoqqutassiiviusumik innuttaasut taasitinneqareernerisa kingorna sapaatit akunnerisa sisamat qaangiunneranni atuutsitsilersinnaallutik. Allannguutissatut siunnersuutit aappaanni pineqarpoq, uranip saniatigut pinngoqqaatinik qinngornernik ulorianartunik akulinnik allanik misissueqqaarnissamik, aatsitassarsiorluni misissuinissamik piiaanissamillu inerteqquteqarnermik Naalakkersuisut atuutsitsilernissaannut inatsimmi tunngavissaq pillugu § 2-p siunnersuummit peerneqarnissaa siunnersuutigineqarpoq.

Najoqqutassiisussamik innuttaasut taasitinneqarnissaat pillugu allannguutissatut siunnersuummut tunngatillugu, tamanna Naalakkersuisut arlalinnik nangaanartoqartippaat.

Najoqqutassiisussamik innuttaasut taasitinneqarnissaat pillugu siunnersuuteqarneq, najoqqutassiisussamik innuttaasut taasitinneqarnissaannut qulequtaq pillugu inatsisissatut siunnersuummik saqqummiussinnginnermi, innuttaasut taasitinneqarnissaat kisiat pillugu immikkut inatsisissatut siunnersuummik saqqummiussinikkut, nalinginnaasumik pisussaavoq.

Piffissami kingusissumi (pingajussaanneerineq) inatsimmut allannguutissatut siunnersuutit innuttaasut taasitinneqarnissaat pillugu siunnersuummik saqqummiussinermi, innuttaasut taasitinneqarnissaat pillugu siunnersuut Inatsisartuni nalinginnaasumik pingasoriarluni suliarineqartussaassanngilaq. Taamaalilluni siunnersuut nalinginnaasumik inatsisartunit politikikkut suliarineqarnissaa pisussaassanngilaq.

Allannguutissatut siunnersuut akuerineqassappat inatsit siunnersuutigineqartoq aamma akuerineqartussaavoq, kisianni innuttaasut taasitinneqarnerat ingerlanneqariinngippat

atuutilersinneqarsinnaanani. Allannguutissatut siunnersuut saqqummiunneqartoq innuttaasut taasitinneqarnissaannut ulluliussamik aalajangersaaviunngilaq. Tassa imaappoq, qaqugu innuttaasut taasitinneqassanersut Naalakkersuisut ilaatigut nammineq aalajangertussaassavaat, ilaatigullu innuttaasut taasitinneqarnerat najoqqutassiisussaammat, taassuma inernera Naalakkersuisunut pisussaaffiliisussaananani. Taamaalillutik innuttaasut taasitinneqarnerat qaqugu ingerlanneqassanersoq aammalu inernera malinneqarniarnersoq, Naalakkersuisut nammineerlutik aalajangertussaallugu.

Tamanna qaqugu inerteqquteqarnissaq siunnersuutigineqartoq malillugu aaqqissuussisinnaaneq aaqqissuussisussaanerlu pillugit oqartussanut inuussutissarsiortunullu annertuumik nalorninartorsiortitsisussaavoq.

Tamanna tungavigalugu, inatsisip atuutsinneqalernissaanut piumasqaatitut najoqqutassiisussamik innuttaasut taasitinneqarnissaat pillugu allannguutissatut siunnersuut (ilassutitut isumaliutissiisummut ilanngussaq A) itigartinneqassasoq Naalakkersuisut inassutigaat.

Siunnersuummi § 2-ip peerneqarnissaa pillugu allannguutissatut siunnersuummut tungatillugu, siunnersuut itigartinneqassasoq Naalakkersuisut inassutigaat.

Inatsisartuni ikinnerussuteqartut § 2-p, pinngoqqaatinik qinngornernik ulorianartunik allanik inatsimmi pineqartunut ilaalersitsinissamut periarfissiisup, sunniutissai isumanerluutigimmit, Naalakkersuisut akuersaarpaat. Inatsisissatut siunnersuummut nassuiaatini allassimasutut, thorium-ip inatsisissatut siunnersuummi pineqartunut ilaatinneqalernissaanut periarfissaq annertunerpaamik pineqarpoq. Thorium inatsimmi pineqartunut ilaatinneqassanersoq qulaajaaneq Naalakkersuisut aallartereerpaat. Taanna ukiup ataatsip iluani naammassineqassasoq naatsorsuutigineqarpoq.

Suliassat thorium-imik akullit aammalu paaanissamut akuersissuteqarnissamut inerilluarsimanngitsut qulaajaanerup naammassinnaata tungaanut utaqqimaartumik inissisimasussaasut, Naalakkersuisut akuersaarpaat. Naalakkersuisut isumaqarput § 2 inatsimmiippat inatsimmiinngippalluunniit apeqqutaatinnagu taamatut tunuarsimaarfeqarneq atuuttussaasoq. Taamaattumik Naalakkersuisut naliliippat thorium siunissami inerteqquteqarnermi pineqartunut ilaatinneqartariaqaraluarnersoq isummerfiginissaa pingaaruteqartoq. Taamaattumik thorium-ip navianassusaanik siunissamilu inatsimmi inissisimanissaanik nalilersuineq sapinngisamik piaarnerpaamik saqqummiunneqassasoq Naalakkersuisut oqaatigerusuppaat. Nalilersuineq taanna, Naalakkersuisut thorium inatsimmi ilanngunniarneraat imaluunniit ilanngunnianninneraat pillugu paasinarsisillugu, tamanut aammalu inuussutissarsiortunut saqqummiunneqassaaq.

Inatsisissatut siunnersuummi inatsimmi tungavissamut aalajangersakkami ilanngussinissaq Naalakkersuisut toqqarmassuk, pinngoqqaatit qinngornernik ulorianartunik akullit allat, assersuutigalugu avatangiisinik isumannaallisaanermilluunniit pissuteqartumik taakkununga inerteqquteqarnissamik pisariaqalersitsisut, pillugit ilisimasaqalernermi sukkasuumik maleruagassanik aalajangersaanissamut periarfissaqarnissamik kissaateqarneq pissutaavoq. Pinngoqqaatinik qinngornernik ulorianartunik akulinnik ajoqusiinnaasunik misissueqqaarnissap, misissuinissap paaanissallu sukkasuumik eqaatsumillu inerteqqutigineqarnissaanut periarfissaqarnermi, assersuutigalugu

aatsitassarsiorfiutileqatigiiffiit Inatsisartut inatsisaata akuerineqarsinnaalernissaa  
atuutsinneqalersinnaanissaalu sioqqullugu, pinngoqqaatit taakkua piiarnissaannut  
pissinnaatitaalersinnaanerat pinngitsoorneqassaaq.

Tassungaa atatillugu oqaatigineqassaaq, nalunaarutit inatsisissatut siunnersuutituulli  
akuerineqarnissaat sioqqullugu aallaaviatigut tusarniaassutigineqartarmata. Aamma  
siunnersuummi tusarniaanermut takussutissiami (siunnersuummut ilanngussaq 1) aamma  
allassimavoq, siunnessami nalunaarutit pinngoqqaatinik qinngornernik ulorianartunik akullit  
allat pillugit maleruagassanik imaqartut tusarniaassutigineqartassammata, aammalu  
suliffissuit aammalu innuttaasut maleruagassanik taamaattunik suliaqarnermi  
akuutinneqartarnissaat Naalakkersuisut sulissutiginiarpaat.

Tamatuma saniatigut nalunaarutit taamaallaat akuersissutitut nalunaarutip  
akuerineqareerneranni tunniunneqartunut atuuttussaammata, oqaatigissallugu  
pingaaruteqarpoq.

Tamanna tunngavigalugu, siunnersuummi § 2-p atorunnaarsinneqarnissaa pillugu  
allannguutissatut siunnersuut (ilassutitut isumaliutissiisummut ilanngussaq B)  
itigartinneqassasoq Naalakkersuisut inassutigaat.

Taamatut oqaaseqarlutik Naalakkersuisut siunnersuut  
pingajussaanneerneqartussanngortippaat.